



Communiqué de presse

de l'Ambassade des Etats-Unis

14-16 rue Rainitovo, Antsahavola, Antananarivo 101 – Madagascar - Tel.: 261 20 22 212 57

Fitsidihana eto Madagasikara nataon' ny Dr. Nahlen, Mpandrindra lefitry ny PMI



Nanao fitsidihana teto Madagasikara ny 30 aprily hatramin'ny 07 may teo ny Dr. Bernard Nahlen, Mpandrindra lefitry ny Finiavan'ny Filoha Amerikana Bush Hiady amin'ny Tazomoka na PMI, niaraka tamin'ny manampahaizana manokana eo amin'ny lafiny fahasalamana avy amin'ny USAID Washington sy ny Foibe miandraikitra ny ady ary ny fisorohana ny aretina (CDC) Atlanta. Vao ny 05 marsa lasa teo ny Dr. Nahlen no voatendry amin'io toeran'ny Mpandrindra lefitry ny PMI io. Fiarahamiasa amin'ny Ministeran'ny Fahasalamana, ny Fandrindrana ny Fianambianakaviana, ary ny Fiahiana ara-tsosialy no anton-dian'ny delegasiona. Narafitra tamin'izany ny Teti-panatanterehana ny Finiavan'ny Filoha Amerikana Hiady amin'ny Tazomoka izay hanomboka amin'ny volana

oktobra izao ny lahasa. Efa nisy tariky ny PMI nivahiny teto iray volana lasa izay nanao tombana ny filan'ny Fandaharana Asa Nasionaly Miady amin'ny Tazomoka.

Anisan'ireo firenena 15 atsimon'i Sahara voafantina hampihena antsasany ny taham-pahafatesana vokatry ny tazomoka ao anatin'ny 5 taona ho avy i Madagasikara. Ny lahasa dia hifantoka amin'ny 85%-n'ny mponina mora andairain'ny aretina indrindra mba hiarovana ny ain'izy ireo. Efa maro ny aina voaaro ara-pahasalamana noho ny PMI izay miantefa amin'olona mihoatra ny 6 tapitriza aty amin'ireo firenena telo voalohany mahazo tombon-tsoa amin'ny fandaharana asa, dia i Oganda, Tanzania sy Angôla.

Niara-niasa tamin'ny ekipa sy ny Fandaharana Asa Miady amin'ny Tazomoka ny Dr. Nahlen ary nanao tolokevitra ho an'ny Teti-panatanterehana ny fandaharana asa izy, indrindra eo amin'ny lafiny teknika mba hampifandraika azy amin'ny vinan'ny fanjakana malagasy hamongotra ny tazomoka amin'ny taona 2015. Nihaona tamin'ny mpiara-miombona antoka lehiben'ny Roll Back Malaria (RBM) ihany koa ny tenany, dia ny Solontena maharitry ny Sampan-drahahaha Iraisam-pirenena ho an'ny Fahasalamana (OMS) sy ny UNICEF izany, mba ho fanajana ny foto-kevitra ijoroan'ny fiombonana antoka RBM. Nanao fitsidihan-dahasa koa ny Dr. Nahlen nandritra ny fivahinianana herinandro nataony teto amintsika. Tany Miarinarivo izy dia nitsidika ny poste sentinelle-n'ny sampandrahahaha ara-pahasalam'an'ny distrika izay manara-maso ny akoram-pahalalana sy ny tondro rehetra mikasika ny aretina tazomoka eo anivon'ny distrika. Ny Kaominin'i Belavabary, any Anjyro Moramanga, no notsidihany faharoa izay ahitana modely tena mahomby eo amin'ny filofosan'ny vondrom-bahoaka hampiroborobo ny fomba fisorohana ny fiadiana amin'ny tazomoka, toy ny lay misy odimoka ela fiasa sy ny fanafody tazomoka. Teo am-piaingana, ny 07 may teo, dia nanambara ny Dr. Nahlen fa mandroso tsara araka ny tokony ho izy ny Finiavan'ny Filoha Amerikana Hiady amin'ny Tazomoka. Nomarihany ihany koa fa hanampy amin'ny fahatomombanan' ny MAP izany finiavana izany.

Talohan'izao ny Dr Nahlen dia Mpanolo-tsaina ambony tao amin'ny Tahirim-bola Iraisam-pirenena miady amin'ny SIDA, ny Raboka ary ny Tazomoka. Filohan'ny Vondrona Mpanara-maso sy Mpanao tombana ny RBM izy hatramin'ny taona 2003. Izy koa no niandraikitra ny famoahana ny Tatitra mikasika ny Tazomoka aty

Afrika (*Africa Malaria Report 2003*) sy ny Tatitra mikasika ny Tazomoka eran'izao Tontolo izao (*World Malaria Report 2005*) novokarin'ny OMS sy ny UNICEF ho an'ny mpiara-miombon'antoka RBM.